

Na osnovu člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo") broj: 38/14 – prečišćeni tekst 38/16, 44/17, 28/18) i čl. 25. Statuta Općine Stari Grad Sarajevo ("Službene novine Kantona Sarajevo") broj: 20/13-prečišćeni tekst" Općinsko vijeće Stari Grad Sarajevo, na sjednici održanoj ...marta 2021. godine, donijelo je

**ODLUKU
O VIDOVIMA SOCIJALNE ZAŠTITE KOJI SE FINANSIRAJU IZ BUDŽETA OPĆINE STARI
GRAD SARAJEVO
(PRIJEDLOG)**

Član 1.

Odlukom o vidovima socijalne zaštite koji se finansiraju iz budžeta Općine Stari Grad Sarajevo (u daljem tekstu: Odluka) utvrđuju se lica i porodice-domaćinstva koja imaju pravo na socijalnu zaštitu, kao i vidovi socijalne zaštite, iznosi, kriteriji i postupak za ostvarivanje prava iz ove Odluke.

Član 2.

1. Pravo na socijalnu zaštitu na osnovu ove Odluke imaju lica koja se nalaze u stanju socijalne potrebe, lica sa dijagnozom teških ili težih oboljenja i imaju prebivalište na području Općine Stari Grad Sarajevo (u daljem tekstu: Općina) u trajanju najmanje godinu dana prije podnošenja zahtjeva.
2. Pored lica iz stava 1 ovog člana, pravo na socijalnu zaštitu na osnovu ove Odluke imaju:
 - lica koja imaju boravište na području Općine u trajanju najmanje godinu dana prije podnošenja zahtjeva, a imaju priznat status raseljenih lica,
 - lica koja imaju prebivalište i boravište na području Općine, kraće od godinu dana, a stupila su u bračnu zajednicu sa licem koje ima prebivalište ili boravište u trajanju dužem od godinu dana.

Član 3.

1. Vidovi socijalne zaštite u skladu sa ovom Odlukom su: novčane pomoći (kratkoročne i izuzetne), prehrambeni artikli i novčane pomoći za kupovinu ogrjeva:
 - Kratkoročna novčana pomoć do 200,00 KM (dvijestotinekonvertibilnihmaraka),
 - Izuzetna novčana pomoć u iznosu do 300,00 KM (tristotinekonvertibilnihmaraka),
 - Izuzetna novčana pomoć u iznosu do 500,00 KM (petstotinakonvertibilnihmaraka) za liječenje u Bosni i Hercegovini,
 - Izuzetna novčana pomoć do 1.000,00 KM (jednahiljadakonvertibilnihmaraka) za liječenje u inostranstvu ,
 - Novčana pomoć za kupovinu ogrjeva u iznosu do 300,00 KM (tristotinekonvertibilnihmaraka),
 - Paketi sa prehrambenim artiklima i higijenskim potrebštinama.
2. Novčani iznos za svaki od navedenih vidova novčane pomoći iz člana 3 stava 1. je maksimalan iznos, koji jedno lice može ostvariti u jednoj kalendarskoj godini.
3. Podnosiocu ili domaćinstvu podnosioca zahtjeva, se takođe može dodijeliti paket sa prehrambenim artiklima i higijenskim potrebštinama maksimalno dva puta u toku jedne kalendarske godine.

Član 4.

Porodicu-domaćinstvo u smislu Zakona o osnovama socijalne zaštite, zaštite civilnih žrtava rata i zaštite porodice sa djecom, čine: bračni partner, odnosno vanbračni partner, djeca rođena u braku i van braka, usvojena, pastorčad i djeca bez roditelja uzeta na izdržavanje, otac i majka, maćeha, očuh, braća i sestre, pod uslovom da imaju prebivalište odnosno boravište na istoj adresi.

Član 5.

Kratkoročna novčana pomoć može se isplatiti dva puta po 100,00 KM (jedenastotina konvertibilnih maraka) u jednoj kalendarskoj godini.

Član 6.

Izuzetna novčana pomoć za liječenje do 300,00 KM (tristotine konvertibilnih maraka), može se odobriti, za liječenje hroničnih i drugih bolesti, za nabavku lijekova koji se ne nalaze na listi lijekova koji se propisuju i izdaju na teret sredstava Zavoda zdravstvenog osiguranja Kantona Sarajevo, kao i za nabavku jednokratnih pelena za nepokretne osobe ili osobe koje boluju od drugih bolesti usljed kojih nemaju kontrolisane fiziološke potrebe.

Član 7.

1. Izuzetna novčana pomoć za liječenje u iznosu do 500,00 KM (petstotine konvertibilnih maraka) može se odobriti za sljedeće teške bolesti: akutna tuberkoliza, maligna oboljenja, endemska nefropatija, hirurška intervencija na srcu i mozgu, sve vrste degenerativnih oboljenja centralnog nervnog sistema, infarkt (srčani i moždani), oboljenja mišićnog sistema, paraliza i druge teške bolesti i teške tjelesne povrede i sl.
2. Pod teškim bolestima i teškim tjelesnim povredama iz stava 1. ovoga člana podrazumijevaju se bolesti koje zbog svoje prirode, toka i dijagnoze zahtijevaju kontinuirano praćenje, bolničko liječenje, upotrebu medicinskih pomagala i medikamentozni tretman skupim lijekovima, a koji nisu na listi lijekova koji se propisuju i izdaju na teret sredstava Zavoda zdravstvenog osiguranja Kantona Sarajevo.

Član 8.

1. Pod teškim bolestima iz člana 7. ove Odluke podrazumijevaju se teška stanja i bolesti:
 - kada su funkcije organizma smanjene ili potpuno odsutne kao rezultat patoloških procesa i kada su ispoljeni teški znakovi bolesti, što bitno smanjuje aktivnost bolesnika i veže ga uz postelju.
2. Pod teškim tjelesnim povredama iz člana 7. podrazumijeva se i povreda koja:
 - teško oštećuje zdravlje,
 - ugrožava život,
 - ima za posljedicu trajna ili privremena oštećenja ili uništenja vitalnih organa.
3. U provođenju ove Odluke primjenjivat će se Lista teških bolesti odnosno teških tjelesnih povreda na osnovu kojih državni službenik, odnosno namještenik u F BiH ostvaruje pravo na naknadu za slučaj teške bolesti ili invalidnosti ("Sl. novine F BiH") broj: 30/05).

Član 9.

1. Izuzetna novčana pomoć do 1.000,00 KM (jednihiljadakonvertibilnihmaraka), za liječenje u inostranstvu, može se odobriti na osnovu preporuke nadležne medicinske ustanove i to u sljedećim slučajevima:
 - operacija vitalnih organa (srce, bubrezi, jetra, mozak i sl.),
 - transplatacija koštane srži i drugih vitalnih organa.
2. Troškovi liječenja do 500,00 KM (petstotinakonvertibilnihmaraka) isplaćuju se na osnovu fakture ili računa zdravstvene ustanove u kojima je liječenje obavljeno ili se treba obaviti.
3. Troškovi liječenja do 1.000,00 KM (jednihiljadakonvertibilnihmaraka) isplaćuju se na žiro račun korisnika pod uslovom da isti prikuplja sredstva potrebna za transplataciju organa za liječenje u inostranstvu.
4. Prednost pri ostvarivanju prava za liječenje u inostranstvu imaju djeca, lica do navršenih dvadeset godina života, RVI sa pogoršanim zdravstvenim stanjem, kao i lica bez primanja.

Član 10.

Socijalnu zaštitu u skladu sa ovom Odlukom mogu ostvariti lica u stanju socijalne potrebe i to:

- pojedinci ili domaćinstva bez prihoda, najmanje 3 (tri) mjeseca prije podnošenja zahtjeva,
- pojedinci ili domaćinstva kojima najmanje 3 (tri) mjeseca prije podnošenja zahtjeva po članu domaćinstva, ostvareni mjesečni prihod, ne prelaze iznos od 20% prosječne plaće ostvarene u Kantonu Sarajevo u predhodnoj godini, a u skladu sa propisima o socijalnoj zaštiti tj. Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodice sa djecom,
- lica koja imaju minimalnu penziju (starosnu, invalidsku i drugu vrste penzije) a imaju konstatovano teško ili teže oboljenje.
- prednost pri ostvarivanju prava, na socijalnu zaštitu, imaju lica definisana u alineji 1. člana 10.

Član 11.

Prihodom u skladu sa ovom Odlukom smatra se prihod koji ostvaruje pojedinac ili članovi domaćinstva podnosioca zahtjeva po osnovu:

- plaće i druga primanja iz radnog odnosa,
- plaće i druga primanja koja se ostvaruju mimo radnog odnosa (što se dokazuje odgovarajućim aktom izdatim od strane poslodavca),
- starosne, invalidske i druge vrste penzije,
- primanja po propisima iz boračko-invalidske zaštite i zaštite CŽR,
- prihodi ostvareni po osnovu autorskih prava,
- prihodi ostvareni po osnovu imovinskih prava,
- prihodi po osnovu registrovane dopunske djelatnosti.

Član 12 .

Pored prihoda navedenih u predhodnom članu koji moraju biti dokumentovani u predmetu na licu mjesta tj. na kućnoj adresi podnosioca zahtjeva, vrši se uvid u uslovnost i stanje objekta u kojem podnosilac zahtjeva živi. Isti se obavlja od strane tima sastavljenog od uposlenika Službe za boračko-invalidsku i socijalnu zaštitu kao i sekretara MZ na čijem području se nalazi stambeni objekat lica koje se obratilo za pomoć.

Član 13.

Svi vidovi socijalne pomoći i zaštite ubuhvaćeni ovom Odlukom će se ostvarivati prema utvrđenoj dinamici i finansijskim mogućnostima Općine.

Član 14 .

1. Vidovi socijalne zaštite i pomoći na osnovu ove Odluke ostvaruju se na osnovu zahtjeva-molbe, uz koji se prilažu dokazi o naprijed iznesenim kriterijima (visina prihoda, prijava prebivališta, izjava o zajedničkom domaćinstvu, medicinska dokumentacija o oboljenju i po potrebi drugi dokazi), a Zapisnik o neposrednom uvidu u stanje domaćinstva sačinjen na licu mjesta se prilaže u predmet spisa, službeno.
2. Zahtjev- Molba, se podnosi putem Službe za boračko – invalidsku i socijalnu zaštitu. O pravima iz ove Odluke odlučuje Općinski načelnik, uz predhodnu stručnu obradu Službe za boračko-invalidsku i socijalnu zaštitu.

Član 15.

O izuzetnoj novčanoj pomoći za liječenje u hitnim slučajevima rješavat će se najduže u roku od sedam dana, a u skladu sa naprijed propisanim procedurama.

Član 16.

Sredstva za ostvarivanje prava na vidove socijalne pomoći utvrđuju se u Budžetu Općine za tekuću godinu, a realizuju prema dinamičkom rasporedu utroška sredstva u mjesečnim kvotama.

Član 17.

Danom stupanja na snagu ove Odluke prestaje da važi Odluka o vidovima socijalne zaštite koji se finansiraju iz Budžeta Općine Stari Grad Sarajevo ("Službene novine Kantona Sarajevo") broj:5/10.

Član 18 .

Ova Odluka stupa na snagu osmog dana od dana objavljivanja u Službenim novinama Kantona Sarajevo.

Član 19 .

Ova Odluka sačinjena je iz 4 (četiri) stranice.

Predsjedavajući OV Stari Grad Sarajevo

dr.sc. Mirza Batalović, dipl. el.ing.

OBRAZLOŽENJE

Pravni osnov za donošenje Odluke o vidovima socijalne zaštite koji se finansiraju iz Budžeta Općine Stari Grad Sarajevo se nalazi u Zakonu o osnovama socijalne zaštite, zaštite civilnih žrtava rata i zaštite porodice sa djecom ("Sl.novine FBiH") broj: 36/99, 54/04, 39/06, 14/09, i 45/16 kao i članu 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Sl.novine Kantona Sarajevo") broj: 38/14 – Prečišćeni tekst, 38/16, 44/17, i 28/18, koji regulišu oblast socijalne zaštite i prava po osnovu iste.

Pojavila se neophodna potreba da se prethodna Odluka koja je donesena na OV Stari Grad Sarajevo 2010.godine, a reguliše predmetnu oblast, prilagodi novonastaloj ekonomskoj situaciji. Uslovi življenja su u mnogome pogoršani zbog većeg broja lica bez zaposlenja i neredovnih primanja, te kao i povišenog broja oboljelih lica sa konstatacijom teških ili težih oboljenja.

Primjenom ove Odluke, su precizirani kriteriji za ostvarivanje prava građana sa područja Općine Stari Grad i stvorili su se uslovi da se zaista pomogne (novčano i naturalno) licima kojima je pomoć neophodna, zbog nastale socijalno - materijalne situacije mnogih domaćinstava, a u skladu sa finansijskim mogućnostima Općine.

Predlagač

Stručna obrada

Služba za boračko-invalidsku
i socijalnu zaštitu

Općinski načelnik putem Službe
za boračko -invalidsku i socijalnu zaštitu